



三異詞錄

客溪樵隱求野錄目次

永曆帝入緬本末之上

永曆帝入緬本末之中

永曆帝入緬本末之下



三異詞錄

求野錄

客溪樵隱本

永曆帝入緬本末之上

永曆十二年戊戌正月以原督師兵部尚書程源為禮部尚書以僉都御史錢邦芑掌院事二月詔贈卹故輔臣吳貞毓范鑛等

先是鑛總督雲貴駐黔省時孫可望一使白文選兩使李定國將兵赴黔與鑛結盟共申倡義扶明之約鑛因從容為定國文選開陳大義且曰萬一可望渝



盟奈何定國曰可望扶明我奉之渝盟我殺之無難也文選之言亦然後帝至安龍可望狼戾自恣無人臣禮文選燕見鑛鑛輒微言之文選自媿又邦芑巡按四川時文選與忠國公王祥盟於烏江邦芑為執牛耳後可望襲遵義王祥走死文選見邦芑亦媿汗不能視左右邦芑曰非公賣忠國乃他人賣公耳因時二燕間言帝在安龍主辱臣死兩人涕數行下於是文選向邦芑折箭自誓必殺可望會李定國自粵西入安龍擁帝而南居間調護文選之力為多可望疑其謀奪其兵幽之別室而鑛已憤卒莫有能為解

者會可望脅程源為兵部尚書時邦芑為僧矣亦縛之至勒授詹事府正詹兩人遂聯行在舊臣各交權可望鎮將此曹樸魯武人酒酣耳熱輒恚可望罵曰剝一張賊皮又生一張賊皮耶源又乘間言於可望文選驍勇可用使功莫如使過文選得還兵柄以此迨交水戰勝文選馬寶雖為首功若開導於平日與離間逆黨奮發忠義於臨時鑛源邦芑其功更不可泯至是帝皆旌之其時馬吉翔用事頗忌源芑之來源功名自許入朝而發吉翔奸狀吉翔嗾言者劾源魯臣事可望非純臣源發憤杜門不視事芑雖掌憲



而贊理定國軍事者為金維新秩左都御史位在芑  
上以故都御史印掛卧閣中不發芑亦鬱：浮沉朝  
請而已貞毓於吉翔仇也鑛非吉翔所素善卹贈皆  
不副望公論惜之

二月清師入黔安順巡撫冷孟鉅死之

清師取湖南入武靖辰沅遂至貴陽於是粵西之南  
太四川：南川東俱失自可望敗走朝端論功行賞  
張官設吏下之宴飲恬愉爭官脩怨絕不以國是為  
念部臣金簡 次第進諫謂內患雖除為憂方大  
同我者方雁行頓刃待兩虎之一斃一傷以奮其勇

而我酣飲於漏舟熟眠於積薪之上能旦夕否乎二  
王老於兵事者也胡亦泄：如是定國疑簡等劾已  
遽於帝前激切陳訴帝亦擬杖二臣以謝之朝士交  
論其執不可移時未決而三路失陷之報踵至定國  
始遂巡引謝二臣得免簡字禹藏越人從蹕入緬死

蠻中

四月蜀王劉文秀薨

文秀之追可望至貴陽也盡收其潰兵可三萬人練  
卒備邊漸有成局晉王不悅也請召之還并召諸將  
之在邊與從可望之南犯者論功罪為分兵自予之

地是以邊警猝至兵失其將將不得兵至於大潰文  
秀先以正月還滇抑鬱不自得每屏人語曰進虎退  
狼晉王必敗國是病篤為遺表曰我怯敵勇事可預  
知臣精兵三萬人皆在黎雅建越之間埋金二十萬  
臣將郝休商知之臣死之後若有倉卒臣妻捧盤匝  
以侍臣子御羈勒以備贄御願駕幸蜀就十三家之  
兵出營陝洛庶幾轉敗為功也乃堯晉王惡之

七月晉王李定國秉黃鉞出師

定國先令李成爵出左路壁黃草壩祁三昇出中路  
壁雞公背白文選出右路壁遵義之孫界壩自三方

告急促定國出師輒云有待蓋妖人賈自明惑之也  
自明善幻術多大言云上帝助兵當以某日下為木  
偶人數百皆長丈許執幡幢為營陣久而無驗時已  
初秋矣定國怒使人殺自明而諱其事乃出兵帝授  
以黃鉞極古來命將之禮無不備至先由中路出關  
而頗後李成爵告急乃移師黃草壩有以兵事諫者  
曰守石關一夫之力當勝是久之踰石關營於遮炎  
河焉祁三昇壁於雞公背之絕頂糧少運艱士不宿  
飽孫界壩尤孤懸滇蜀之表聲援不及識者舉以為

憂



十月晉王李定國告遮炎河之捷

十二月晉王李定國兵潰於遮炎河帝出奔遂狩於緬於是雞公背孫界壩之師俱大潰定國與清師戰於遮炎河之右小勝遂不設備大軍驟至壓其營而壘明日決戰南兵鎗炮北兵弓矢日中未決忽大風北來金鎗失火其地多山茅草穢烟焰漲天北兵乘風馳射定國懼棄衆先走兵遂大潰十三日入省急請帝出幸凡有言戰守者俱以為書生計不足聽也十四日帝大集文武議所之蜀王劉文秀之舊部陳建等舉文秀遺表中語為請定國曰蕞爾建昌何當十

萬人之至不如南走緩出粵西急入交趾難之者曰北兵乘勝踰黃草壩則臨沅廣南道路中斷且喪敗之後烏能整兵以逆方張之勢不可黔國公沐天波乃曰自迤西達緬甸內地有糧糗可資出邊則荒遠無際萬一追勢稍緩據大理兩關之險猶不失為蒙段也帝可其議十五日車駕發滇宮官兵男婦馬步從者幾數十萬人自古乘輿奔播未有若此之衆者晉王以重兵殿後時國勢既搖衆心舉變艾能奇之子艾厥業糾狄三品等數人以驍騎千餘伏大寺中謀劫定國而北定國覘者知其謀以告十八日已晡

定國遽率數百人嚴隊西走然厥業者亦不敢追也

永曆帝入緬本末之中

永曆十三年己亥正月初四日帝至永昌

帝自滇發時百官扈從軍民哀送者日行不過三十里其後兵士不得食恣取之民間以至所在竄匿御前供頓俱乏庶僚負病離次不前者甚衆崎嶇入大理定國亦至明日帝行定國請堅守大理許之後數日白文選以孫界壩南潰之兵至列陣下圍衆尚萬餘定國率數百騎赴之文選憤涕叱定國曰人主以全國全師界一旦至是誰執其咎者定國慚甚南向叩首曰帝幸赦臣起謂文選曰殿下亦赦我願奮身



一死以贖前罪文選收涕謝曰王幾許人死敵何益  
王行矣警蹕有關王之過斷後有失文選之罪王行  
矣定國遂行又數日平西王吳三桂追文選及之戰  
於下關又戰於叮嚀山文選敗南走入山是月定國  
與清兵戰於磨盤山棄其軍走清師亦引還定國聞  
文選敗遂渡潞江即古怒江也至磨盤山下即古羅岷山  
諸將他往者漸會勝兵萬人因山險為三伏以泰安  
伯竇民望為初伏廣昌侯高文貴為二伏總兵王璽  
為三伏今日須敵至三伏乃舉礮首尾橫擊之清師  
至山下得降者盧桂生言狀清師釋馬而步搜伏者  
望箐莽叢積中矢礮兩發民望不得已發礮出戰中  
伏者亦發礮趨下救之戰於山上短兵相接自刼迄  
僵屍委疊其時民望血戰不已中流矢死南兵氣沮  
猶據險而守及聞定國走將士大失望夜半遂各散  
去定國時坐山頂上聞信炮失序大驚曰兵敗矣遽  
先走既踰險問帝安在知者曰帝西行去騰越已百  
里路界茶山緬甸之間定國曰吾焉從從蹕而追者  
及之君臣俱死無益也姑他往以圖再舉乎遂棄帝  
去

二十四日帝次於野

帝南行尚未知磨盤山之潰野次未定而總兵楊武至言定國遠逃追者且及帝惶遽行時漸昏黑行數里失道迷大谷中距故處一望耳而宮人竄失公私行李多為楊武劫奪

二十五日扈將孫崇雅叛

崇雅忽叛劫擄殺害尤甚

二十八日扈衛靳統武叛帝次緬漢

靳統武亦引其衆叛去帝乃決意入緬出錢壁關關外即緬地矣緬酋使來迎緬酋自稱於國曰金樓白象王蓋處則樓居出則乘象足未嘗履地進表天

朝則稱曰緬甸宣慰使司臣某國人稱之曰某法猶言公道主人也至是奉迎具表如常儀另奏曰天王遠臨百蠻震驚請從官以下勿佩戎器馬吉翔傳旨從之諸臣皆諫曰猛虎所以威百獸者以爪牙故也奈何自去戎衛以啟戎心不聽是日帝至緬漢緬使執禮甚恭并進衣食食物華亭侯王維恭謀擁太子還入關由茶山進鶴麗不果

二月初一日帝至水次

緬人艤四舟以待帝一后太子一司禮監李國泰一文安侯馬吉翔一浮水東下即大金沙江其南與海



接古稱黑水此其一也從臣無舟或水或陸聽自為計先在騰越從官以下及婦寺數尚四千至蠻漠止一千四百餘人至是僅六百四十六人而已

十八日帝至井梗

至井梗暫止蹕因緬酋奏宮室未備故也

二十四緬酋來要大臣議事

帝遣吉翔弟馬雄飛及鄔昌琦往酋不令見止通事傳譯所問多神宗時事二人未習中朝典故竟不能答頗為所嗤最後出神宗勅書其寶文較今微異惟黔國公沐天波征南將軍印文無別是役也行人不

材遂啟遠蠻以不共之漸

三月緬人殺從官數百人於亞哇城

時黔國公沐天波及綏寧伯蒲縵總兵王啟隆等謀奉帝往護肅撤孟艮以就晉王李定國之師馬吉翔不從遂止自定國率殘潰之衆分道入緬焚掠劫殺千里相望緬人遂大發兵守隘與官軍憤怨益甚至是從官以下由陸者不知帝尚留井梗也徑抵緬都之亞哇城緬人以為寇至發兵圍之乃死者過半通政司朱蘊金總兵姜承德自縊死餘俱安置遠方後竟無存者

四月咸陽侯祁三昇帥師迎蹕

三昇以兵臨緬緬人請勅止之諫者曰此我君臣出險之一時也不聽使丁調鼎及部郎楊生芳賈勅書往且曰朕已航閩將軍善自為計三昇捧勅痛哭以為帝真航閩也遂撤師

五月帝至者梗

初四日緬人脩龍舟鼓樂奉迎其明日帝次亞哇城下地名者梗者即大鷓鴣城舊址也界大金沙大盈江之間地饒而阻緬人結草為廬殿編竹為城請帝入居之百官咸草次相依

初九日緬人未貢

緬酋遣使來貢禮儀甚設自潰衆四掠百蠻受荼毒之慘怨恨日甚然未敢懟人主也自祁三昇奉勅撤師後緬人以帝威令尚行恐一旦移蹕紆禍無計故迎帝崇奉以為緩急自救之策且潛阻中外使聲息不得相通帝於是益困矣

八月十三日緬酋脅黔國公沐天波以臣禮見揚在任國璽疏劾之

緬俗八月十五群蠻皆以贄見酋張嘉會以享之及是給天波至脅令從緬制白衣推髻跣足領諸海邦



及楚夷酋長而拜以誇示遠方天波歸自首且曰我  
為皇上屈也於是學士楊在行人任國璽以天波貪  
生辱國疏劾之不報

九月緬人進禾

帝以廩給從官

永曆十四年庚子七月鞏昌王白文選帥師攻亞哇城  
不克而還

文選自大理之敗間道渡隴川潞江踵帝之後行以  
帝自當入亞哇城矣二月中臨江不知帝所在還兵  
南甸者久之至是招集流散有精兵萬餘復至江潞

諭緬人假道迎帝不許遂攻之城垂克緬酋懼求勅  
止之文選不奉詔謂使者曰向來祁將軍來詔云已  
航閩若前詔為真則今勅為贗使今勅為真則航閩  
之後復何自而來君非臣何以威衆臣非君何以使  
人蠻人不足信也使 者曰諾既去不至會緬守益堅  
文選知不可拔望鷓鴣城痛哭引兵去

九月帝推御寶以給從臣

先是楊武孫崇雅之變乘輿輜重散亡殆盡惟中宮  
餘金盆銀盃各一又為輿夫竊去至是庶僚之貧者  
饑寒藍縷鳩鵠不足喻也馬吉翔李國泰以語激帝

帝怒擲皇帝之寶令碎之以濟從臣之不能舉火者  
內監李用叩頭言不可吉翔國泰竟鑿以給賜時吉  
翔等擁贊自贍絕無周給之誼但縱博豪飲高歌達  
旦宮寢咫尺無所顧忌或值蠻人來市無尊卑少長  
短衣岸幘與蠻婦席地交易襍以謔笑中國綱紀蕩  
然矣

永曆帝入緬本末之下

永曆十五年辛丑二月鞏昌王白文選晉王李定國帥  
師大敗緬兵於錫波江

先是定國入緬中餘衆不及千計檄調諸將皆以磨  
盤山之敗為口實不相附遂引而南至順蒙界外畧  
地而食勢日窘會廣國公賀九義以全師自廣南渡  
九龍江赴之精兵萬人攻孟艮拔其城地饒魚稻諸  
將又稍至軍勢復振久之九義以定國悍戾不可  
近謀引去事泄定國格殺之遂併其衆文選先居木  
邦之南甸相距二千里不相聞也迨攻緬不克引還



深以為耻知定國取孟良并有九義之兵乃為書誚讓之責以大義定國遂全師而西與文選會於半道相與莅牲歃血志必克緬人知之拔其豪邊牙鮮邊牙保為大將集兵十五萬人相遇於錫波江上臨戰列巨象千餘夾以鎗礮橫陣二十餘里鳴鼓震天大噪而進二王之兵不及什一且戎器耗失所搃惟長刀手槍白楮而已定國誓其衆橫擊之短兵相薄殊死鬪良久緬兵大敗積屍萬計殺其將邊牙保而邊牙鮮猶收其衆柵大榕樹下蔭可百里其夕鳴鼓不絕如列隊狀比曉盡走還無一人存者二王遂渡

錫波江臨大金沙江以襲緬城

四月晉王李定國鞏昌王白文選攻緬不克引兵還

定國等臨大金沙江告緬人假道入覲并責令具象馬行糧為入邊之計緬人不聽盡燒其江舡沿江據險設礮以守月餘二王糧少氣沮緬中耆老曰此間北至鬼窟山有大芭蕉林伐之可作筏以渡既渡尚有大居江阻之其地饒材木居民數百家燒鑪冶錢舟可立具也二王從之浮蕉為梁迄濟伐材設廠造舟焉未幾緬人斷浮梁擾廠所值軍中饑疫大作死者日衆時軍行皆挈眷老幼落索為累甚盛不得已

為還軍之策或曰緬中瘴癘夏秋為盛加以千里無烟人何以濟孟艮不可得返矣有地名風沙擺右者在西南海上行月餘可至其地高涼其民魚稻蓋往諸二王又從之及行至亦渺顙山下其山亘數百里登陟既竟見西南大海矣是夕文選裨將趙得勝惑其衆擁文選北走且曰王毋為賀九義之續也文選入山守險自保後數日定國不得已引餘兵三千間道還孟艮後文選入邊遂迎降於清師

五月緬人殺其酋立酋之弟為王

自潰兵闖入緬地其民罹兵火之厄死者幾半國人

懟其酋曰王迎帝故帝來階之為禍者王也酋曰我迎帝不迎賊也賊禍我帝不禍我奈何以是為怨於是上下相疑忌會二王來攻酋之弟守景邁景引蠻衆五萬人入援并大出金帛以犒其衆諸蠻奮發凡為戰守其畧一出於酋之弟國人愛之遂歸心焉是月二十三日縛酋置篋輿中投之江立其弟為王遣使來告且索金幣帝不許

六月緬人殺從臣并圍帝所殺漢人無遺

自前年八月黔國公沐天波屈拜緬酋之後每鎮兵來迎緬人大恐輒禮迎天波乞詔諭止且許資象馬



糧糗相送入邊而諸營飄忽進銳退速蠻益輕我及  
二王亦渺顙山之潰蠻尤肆志然尚未敢為逆也時  
平西王吳三桂既留鎮滇南與其固山楊坤謀效黔  
國公世守滇土以為磐石之計必入緬取帝以獻乃  
可於是上疏固請嚴檄緬酋令獻帝自效緬人乃謀  
殺從官以孤帝勢使人來曰賊衆潰矣緬土安矣請  
與天朝大臣誼盟以相信也天波欲毋往馬吉翔李  
國泰曰蠻人敬鬼而重誓可行也乃徃日向午緬人  
以兵三千圍帝所索漢人無少長貴賤皆飲刃而死  
有竄入帝宮伏匿者悉搜而殺之宮中兩貴人皆自  
縊死者相望伏屍尤甚良久緬人護駕官大呼曰毋  
得擾害老皇帝亂始定遂移帝置他所緬僧使其徒  
來進飲食帝乃得濟是日赴咒水之會死知名者松  
滋王某黔國公沐天波文安侯馬吉翔都督馬雄飛  
綏寧伯蒲英華亭侯王維恭侍郎鄧士廉楊在御史  
任國璽郎昌琦部郎楊生芳鄧居詔學錄潘璜典簿  
齊應選總兵魏豹王啟隆內臣李國泰等二十四人  
其未赴會自縊於行宮者吉王慈燿王妃張氏宗臣  
議漆戚臣王國璽錦衣衛官趙明鑑王大雄等二十  
二人嗚呼行在諸臣雖賢不肖間殊其崎嶇守死則

一至是同為一丘之貉姑勿論而帝已為吳三桂几  
上之肉也緬人何足恨耶明日帝驚悸致病緬人慮  
帝有不測無以致辭於三桂乃迅潔行宮迎帝仍入  
居之復貢衣被銀布等物

十二月初三日平西王吳三桂帥師臨緬緬人執帝以  
出獻於清

是日也三桂親臨江緬人奉金盤十六枚置饌以迎  
緬酋來紹帝曰李定國兵又至矣馬步數萬列在江  
許索帝甚急語未竟數緬人舁帝所坐飛行去後宮  
號哭震天步從五里許乘舟渡江舟大不及舥三桂

使其前鋒章京高得捷負之登舥帝問曰卿為誰對  
曰臣平西王前鋒高得捷也帝默然

初九日帝還滇

吳三桂以師擁帝還滇遂以捷聞於京焉

晉王李定國以憤薨

緬於萬曆中絕貢且據有木邦麓川及八百媳婦之  
地雄恃西南然與古刺暹羅兩國為世仇初帝自蠻  
漠舟行從官雲散有入古刺者馬九功江國泰等總  
兵溫如珮等則入暹羅如珮啟禎朝大鎮為時名將  
暹羅主絕愛之妻以女如珮又先以女為晉王次妃



於是間道通殷勤謀連兵攻緬九功等於古刺招集  
潰兵得三千餘人亦致書晉王相與犄角兩國之兵  
將發會吳三桂執帝入滇謀者以告定國躡踊號哭  
自擲於地者百十許不食三日表於上帝祈速死憤  
憤長號致病七日而薨暹羅古刺師皆大失望引還  
永曆十六年壬寅四月吳三桂弑帝於滇

四月二十五日部覆至吳三桂吳三桂使章京夏國  
相以帛進帝帝遂崩皇太子皇姪俱殉之時日在禺  
中忽大風霾黃霧漲天雷電交作見空中二龍蜿蜒  
而逝平地水深尺許遠近無不悲悼焉明絕

是年吳三桂晉爵為親王益甲踰萬人移家口於漢  
中美厥功也其後緬蠻至者曰晉王所墓地至今春  
草不生蠻人過之者輒跪再拜乃去云

三異詞錄

自非和尚也是錄目次

原序一篇

起永曆十二年戊戌

終永曆十六年壬寅

也是錄



三異詞錄

也是錄

自非和尚本

原序一篇

嗚呼國運之興衰成敗天乎人也人乎天也僕每讀史  
至國破君亡之際未嘗不掩卷歎歎而不忍卒讀者嗟  
夫天步之艱如此人謀之失如彼天人俱失何以為國  
嗚呼痛哉前明肇基江左定鼎燕都洪永之蘊釀其仁  
宣嘉之昌隆其運隆萬之裕大其模可謂盛矣既而流  
寇橫噬金甌墮地君死社稷萬古為昭一時之忠臣烈

也是錄

士死國殉君四海之貞士義民勤王倡義捐身碎首蹈  
及如飴豈非德澤之入人者深而忠義之性常難泯乎  
繼而聖安不守於金陵思文復潰於閩粵制閩諸臣爰  
立永皇意以成旅未始不可興少康白水未始不可起  
光武帝立一日明祀亦少延一日諸臣不敢負永帝之  
心即諸臣不敢負太祖養士之心也奈何兵皆烏合將  
盡叛臣流離行間跋涉險阻成棟之師既覆騰蛟之功  
不成翠華奔播於殊荒黃屋飄搖於烽火無斟郟之燼  
可然無朔方之師可召無海島之艦可航帝至是雖具  
大有為之資亦英雄無用武之地矣南寧迎駕僅同催  
泥之謀可望任僎罪可勝誅乎幸而晉王以喪敗之餘  
乘虛奪駕遂蹕南雲交水之犯省會之攻爰乎且剽  
及於二宮矣一朝奔北狼狽降清示瑕獻圖兵端遂啟  
漁人之利清實收之况乎晉王且自撤其藩籬維新更  
日弄其威福三路外攻逆黨內應晉王方倉皇於舟中  
之敵國復奚暇整戈禦敵也鑿與西邁奔走遐荒托食  
緬蠻有如幕燕方且文恬武嬉苟延歲月不謀出險束  
手持亡天波之策不行吉翔之恣日甚卒之衆叛親離  
內外阻絕清師出塞帝遂北轅大送喪心奉纁進弒明  
之宗祀忽焉遂斬嗚呼嶺嶠遺聞猶載輟耕之錄茲焉



緬疆遷播難徵文獻之存賴有從駕故臣鄧凱之一錄  
於以收什一於千百而忠奸遺跡自爾昭然僕不揣固  
陋竊欲博採遺文以續明紀抑以帝立於廣其始事也  
終於緬其終事也自古無不亡之家國不覆之宗社獨  
惜帝以仁柔之資際不可為之日黃圖板蕩豺虎縱橫  
上繫於母后之高年弗忍自為引決而懷慙再辱殞身  
賊手嗚呼人歟天也然天絕明於蠻而不絕明於史則  
斯錄之存未始非天意存焉僕得之鄉閭好事之家借  
而繕錄一帙初讀而憤悒再讀而連瀕謹序而存之以  
俟後世之司馬遷班固其人者桐山樵隱羅謙雪涕書

起自永曆十二年戊戌迄於永曆十六年壬寅

永曆十二年戊戌十二月十五日帝去滇

永曆十三年己亥正月初四日帝至永昌

閏正月十五日帝自永昌啟行

十八日帝至騰越帝自永昌入緬文武從臣約四百餘  
員隨行之衆凡三千餘人時護蹕者靳統武也

閏正月二十四日甫下營未及炊忽揚武兵自後至言  
清師隨至矣於是兵士駭散四走馬吉翔與司禮李  
宗貴速帝即行遂狼狽疾奔不復相顧軍馬馳驟火  
光徹天從臣囊橐一時俱失貴人宮女為亂兵所掠

幾盡

二十五日帝至鐵壁關孫崇雅叛橫途截劫從臣稍後者俱被擄

二十六日新統武叛棄帝由斜谷去

二十八日帝入緬關緬人要從臣盡去弓矢甲仗勿驚擾百姓咸不從馬吉翔矯旨從之是日帝至苦漠緬人迎獻頗恭謹

二十九日黔國公沐天波與華亭侯王維恭典壘李宗貴等議保護太子入茶山既可居外調度亦可遙為聲援令緬人有所顧忌請帝旨皇石不許

三十日帝啟行

二月初一日帝至大金沙江緬人具四舟以迎僅足供御從臣俱買舟走小河又聞有陸路可達即有從陸者計從臣在騰越不下四千人時奉點查止存一千四百七十八人內從舟者僅六百四十六人餘皆從陸

初四日馬吉翔李國泰等傳諭開行時太后東宮俱在江許太后怒曰我且不相顧不懼陷官家於不孝乎乃止

初六日帝自金沙啟行



十八日帝至井梗緬人梗於途日行僅三十里

二十日緬人來奏我兵四集請勅止之是晚召諸臣集

議御舟前詔問孰可行者衆諉謝行人任國璽與鄧

凱請行馬吉翔復患二臣前揚其過私語緬人曰彼

二人者無家去則不返矣會各營撤去遂輟不行

二十四日緬酋來要大臣過河議事帝命馬雄飛鄔昌

琦往緬酋未之見也譯者傳問皆神宗時事二人不

能答蠻哂之復出神宗朝所賜勅書相示其實稍有

不同疑以為偽乃出黔國公征南將軍印文磨對始

信蓋緬蠻於萬曆二十二年因亂請救不報是年即

與緬絕故也時亡國出奔陵夷式微有不忍見聞者

三月黔國公沐天波與綏寧伯蒲纓總兵王啟隆招馬

吉翔集於大樹下天波曰緬酋無禮日甚不若走護

肅撒孟良等處猶可圖存吉翔曰是謀非吾所敢聞

也皇上三宮具在俱付之公等可矣諸臣默然後乃

知白文選以二月初五日率兵抵亞哇城相隔僅五

六十里然亦不能悉帝狀縱兵焚掠而去

十七日陸行諸臣至亞哇城隔河五里暫息緬酋疑曰

此輩非避亂當窺我土地耳發兵圍之被害者多人

倖存者散令各村安置總兵潘世榮降於緬通政司

朱蘊金中軍姜承德皆自縊

四月芒漠稱有迎駕兵祁姓者近郊請勅止之馬吉翔遣錦衣衛丁調鼎考功司楊生芳賫勅往祁兵得勅不進吉翔復與緬把隘官勅一道云朕已航閩後有一切官兵都與殺却

五月初四日緬首遣多蠻以龍舟鼓樂來迎帝於井梗初五日帝去井梗

初七日帝至亞哇城隔河駐蹕

初八日帝至者梗即旱路從臣舊劄地也預構草舍十楹令上入居之圍以竹城蠻兵守之從臣悉購草結

屋而棲焉

初九日緬首備物來獻帝亦優答之時緬婦日來互市諸臣無尊卑上下皆短衣跣足襍入隊中席地譁笑率以其伍呼盧縱飲禮法蕩然有譯者私語大理人曰前者入關若不去戎備緬王方將遠迎今又盡棄中朝法紀大為蠻人嗤笑不知後將何極矣

八月十三日緬人來要黔國公沐天波過河並挾幣帛緬俗以八月十五日各蠻來獻緬首欲誇示遠近脅今天波亦椎髻跣足以緬禮見天波不得已曲從之歸而泣告衆曰蠻人無狀我所屈者為保全皇上計



也若乃相抗不知彼作何狀諸臣有不以戎為罪府  
乎禮部楊在行人任國璽具疏劾之不報時帝患腿  
瘡旦夕呻吟不已諸臣酣飲自若宛然太平無事時  
也中秋之夕馬吉翔李國泰方呼梨園黎應祥演劇  
佑觴應祥泣曰此去行宮密邇且上躬不豫此時何  
時耶雖死不敢為此忍心事吉翔慚怒痛鞭之蒲纓  
所居亦近西內大開博局叫呼達曙聲徹帝所帝怒  
令毀其房纓既移居縱博如故

九月十九日緬人進新穀帝命分給從臣之匱乏者吉  
翔給散徇私不均鄧凱詬之於行殿吉翔旗鼓吳佩

爵粹凱而仆傷其足遂不能行

永曆十四年庚子七月緬人復來台黔國沐天波過河

天波力辭緬使曰此行非前比宜冠帶而往則定

有加禮既乃知為各將臨城晉王李定國帥師迎蹕

有疏云前後具本三十餘道不知曾否得達今與緬

王約議於何地迎鑿伏望旨示而諸臣如燕處堂絕

不以出險為念緬人求得一勅朦朧其詞外兵候久

聲息杳然遂皆引還其後緬人乃言此輩非有實心

為主但於各村焚殺塗毒生靈而已時馬吉翔楊在

等囑一通緬語之潘璜以扶鑿術進妄云勤王之師

某日當至耶以欺罔上聽邀賞逢迎復慮定國得入  
諸臣共攻其罪惡一切惟事苟安陞遷仍索貨賄遣  
黜亦以怨仇卒至悞國亡君而不顧可悲也夫

十月馬吉翔奏有大臣三日不舉火者以危辭激帝帝  
怒命典寶太監李國用碎皇帝之寶以給從臣國用  
曰臣萬死不敢奉旨已而馬吉翔李國泰竟鑿以給  
賜焉馬雄飛為吉翔助虐請託者非雄飛不得當也  
行人任國璽集宋末賢奸利害纂成一帙進上上覽  
未數篇國泰納袖中出之吉翔恨之不已

永曆十五年辛丑二月二十八日鞏昌王白文選密遣  
緬人賫奏至云臣不敢速進者懼急則變生須其送  
駕出險為上策也帝賜璽書慰勞備至時文選兵去  
行在僅五六十里已架浮梁謀渡河數日後緬人斬  
浮梁不得渡文選引兵去

三月從臣僕御有積憤不甘者相與刑牲為盟將奉東  
宮奪關而去且殺吉翔國泰以杼公怒事洩吉翔奏  
聞以為將劫太子投緬人也傳密旨取黔國公沐天  
波家丁李某及王啟隆家丁何爰坐以首亂令各本  
主殺之

五月道臣任國璽上疏有時事三不可解之語且云禍



迫燃眉當思出險得旨令國璽獻出險策皆為吉翔國泰所沮竟不能行

二十三日緬蠻裁其凡而自立遣官索賀帝不許

七月十六日緬人來召當事大臣過河議事皆托故不行

十八日緬使復至曰此行無他我王子深懼天朝大臣包藏不測以相圖也請得共飲咒水以明心彼此之疑既釋乃可發令貿易以通有無耳

十九日馬吉翔李國泰強諸臣偕行所存老內官一二入侍上鄧凱以足疾免又一璫以卧疾辭餘皆過河

已刻緬兵三千圍行在呼曰爾等大漢可出飲咒水不出者矛洞其胸矣衆猶豫欲格鬪無寸兵且慮上

與宮闈並罹鋒鏑勢窮相率而出則以三十人縛

一人盡殺之時帝后急欲投繯有內侍進曰皇太后

春秋高矣皇上既失社稷復棄聖母其何辭以謝後

世無寧姑緩以伺天命乃止既而兵馬入宮二貴人

并宮女俱自縊於是從臣妻女自縊甚衆懸庭樹者

纍纍俱滿帝與太后以下共二十五人聚一小房驚

懼無措逾一二時有譯者引護守緬官傳呼而至曰

不可壞皇帝與沐國公時橫屍遍地緬官請帝移至

天波所居存者大小三百四十餘人萃一小樓哭聲  
聞數里凡三日夜各寺緬僧憫之為私餽飲食始知  
過河諸臣被殺無遺惟黔國公沐天波與王昇魏豹  
王盛隆皆格傷緬卒數人乃死

二十一日緬人請帝仍入居舊內

二十五日緬人進銀布卧具諸物致辭曰我王子本無  
是念緣天朝各兵焚殺肆毒於外民寔甘心以有此  
舉也時上不豫所存老幼男婦無不病死者相屬先  
是從陸諸臣止於他所不數日緬人殲其婦女而安  
置諸臣於一小國中及是緬酋令盡殺之從亡之臣

遂無噍類矣

十二月初二日未刻有緬官謁帝曰外兵臨城當發兵  
往逼兵馬取途於此恐驚天家請移別所語未竟數  
人昇帝所坐疾趨去太后中宮號哭震天後復來肩  
輿二太后中宮遂得御輿去從者徒步渡河至岸昏  
黑三鼓入大營始知為吳三桂兵也

初四日帝至吳三桂營

初六日帝復返啞哇城

初九日帝長發歸滇

永曆十六年壬寅三月十三日帝還滇



四月初四日命鄧凱出居於外

十八日吳三桂弑帝於瀛城皇太子皇姪俱被難

按辛丑七月十九日赴呪水之會被難者凡四十二人

松滋王 沐天波 馬吉翔 馬雄飛 蒲纓

王維恭 鄧士廉 鄧居詔 楊在 鄔昌琦

任國璽 王祖望 裴廷謨 楊生芳 郭璘

潘璜 齊應選 魏豹 安朝柱 王昇

陳謙 王盛隆 龔勳 吳承爵 張伯宗

任子信 張拱極 劉相 宋宗宰 宋國柱

劉廣益 廣益弟 某 丁調鼎 李國泰 李茂芳

楊宗華 李崇貴 內監周 盧沈楊

緬兵入宮自縊者一十八人

吉王 吉王妃 某 黃華宇 熊維賢 趙明見

王大雄 王國相 吳承胤 朱文魁 吳千戶

鄭文遠 李既白 凌雲 嚴麻子 尹襄

陳德遠 馬寶二差官

又貴人劉楊二氏松滋王妻皇親王國璽并妃及諸

臣妻女自盡者凡百五十人外齊環妻吳承爵妻王

盛隆妻姜承德妻赴死尤烈

其從陸諸臣被戮者岷王朱蘊金姜世德馬九功潘  
世榮范存禮向鼎忠溫如玠劉九臯等其知名者也  
未遭亂而以疾卒者潘琪齊環米仲王偉瑞昌王劉  
盡忠徐鳳翥并內官數人

壬寅從帝還滇被難者吳師相一子一女一妾鄔昌  
琦一子魏豹子宗臯姜承德二子丁調鼎二子趙明  
見一子黎應祥一子王祖望僕新兒康晉吾子節居

詔僕節王





